

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat (Utaqqiisaasumik inissiat nalingisa akileraarusersorneqarnerat, akileraartarnermi nalikilliliinerit pillugit maleruagassat sukaterneqarnerat)

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, kingullermillu Inatsisartut inatsisaatigut nr. 20, 18. november 2010-meersukkut allanngortinneqartumi, allanngortinneqassapput makku:

1. § 15-imi imm. 5-tut ilanngunneqassaaq:

"Imm. 5. Aningaasarsiat akileraaruteqaataasussat naatsorsorneranni ernianut aningaasartuutit, imm. 1-imiit imm. 3 ilanngullugu pineqartut akiligassanngorsimasut 90 procentii ilanngaatineqarsinnaapput. Aningaasartuutit namminersorluni inuussutissarsiornermik ingerlatamut attuumassuteqarpata, oqaaseqatigiinni siullermi killiliineq atuutsinneqassanngilaq."

2. § 19-ip kingorna ilanngunneqassaaq:

"§ 19 a. Aningaasarsianik akileraaruteqaataasussanik naatsorsuineri inissiani tamakkiisumik ilaannakortumilluunniit akeqanngitsumik ineqartitaanerit nalingi, matumani ilanngullugit utaqqiisaasumik inissiani aammalu utaqqiisaasumik inigisassaq sioqqullugu inissiani ineqartitaanerit nalingi ilanngunneqassapput, taamaattorli takuuk § 34, imm.1, nr. 3."

3. § 22, imm. 1 imatut oqaasertaqassaaq:

"Selskabit il.il., § 1, imm. 1, nr. 3-miit 14-imut naapertorlugit tamakkiisumik akileraartussaasut imaluunniit § 2 naapertorlugu killilimmik akileraartussaasut, pigisat § 24, imm. 1, nr. 1 naapertorlugu, akileraartarnermi nalikilliliinerit il.il. pillugit nalunaarummi nalikillilernerneqarsinnaasutut taasanik, annertunerpaamik imm. 2-mi taaneqartut nalikillilernerneqarsinnaasut an-nertoqataannik akileraarutitigut nalikilliliisinnaapput."

4. § 22, imm. 2, nr. 4-mi allassimasoq "100.000 koruuniuppata" allanngortissaaq imaallillugu: "50.000 koruuniuppata".

5 § 23 imatut oqaasertaqassaaq:

"§ 23. Inuk, § 1, imm. 1, nr. 1 aamma 2 naapertorlugit akileraartussaataitaasoq, imaluunniit § 2 malillugu killilimmik akileraartussaataitaasoq namminersorluni inuussutissarsiornermik ingerlataqarnermini isertitaqartoq, pigisat § 24, imm. 1, nr. 1 naapertorlugu, akileraartarnermi nalikilliliinerit il.il. pillugit nalunaarummi nalikillilernerneqarsinnaasutut taasanik, annertunerpaamik imm. 2-mi taaneqartut

nalikillilerneqarsinnaasut annertoqataannik akileraarutitigut nalikilliliisinnaavoq.

Imm. 2. Ukiunut ataasiakkaanut akileraarutitigut nalikilliliinerit annertunerpaamik nalinut ukununga naapertuutissapput:

1) Illuutit atortullu ikkussorneqarsimasut pissarsiarineranni nalingisa ukiumut 5 procentii angullugit nalikillilerneqarsinnaapput.

2) Umiarsuit timmisartullu pissarsiarineranni nalingisa ukiumut 10 procentii angullugit nalikillilerneqarsinnaapput.

3) Nalikillilerneqarsinnaasunut allanut aningaasartuutit il.il. aammalu ingerlatsinermut atortut, pequtit pissarsiarineranni nalingi aammalu pigisanut piffissami killilimmi pisinnaatitaaffinnut akiliutitut il.il. 30 procentii angullugit nalikillilerneqarsinnaapput, ukiup aningaasarsiorfusup naanerani pigisap nalikillilerneqarsinnaasup nalinganit tunngaveqartumik.

4) Pigisanut nalilinnut nr. 3-mi taaneqartunut aningaasartuutit imaluunniit pissarsiarineranni nali 100.000 koruuniuppata taakkualuunniit ataallugit naleqarpata 100 procentii angullugit nalikillilerneqarsinnaapput.

Imm. 3. Namminersorluni inuussutissarsiornermik ingerlataqartut imm. 1-mi taaneqartut nalikillilerneqarsinnaasunut aningaasartuutit aammalu pigisanut nalilinnut il.il. imm. 2, nr. 3-mi 4-milu taaneqartunut kontomik ataatsimut naatsorsuiffiusussamik naatsorsuuteqassapput. Ukiumi nalikilliliissutit ukiup aningaasarsiorfusup naanerani nalikillilerneqarsinnaasup nalinga tunngavigalugu nalikilliliissutigineqartassapput. Naliusoq taanna ukiup aallartinnerani naliusup nakilliliissutaasinnaasutut aningaasartuutit imaluunniit ingerlatsinermut atortut il.il. pissarsiarineranni nalinginik ilallugit naatsorsorneqartassapput, taakkua ukiumi aningaasarsiorfusumi pissarsiarineqarsimappata, aammalu ukiumi ingerlatsinermut atortut il.il. ukiumi aningaasarsiorfusumi tuninerini nalinginik kiisalu imm. 2, nr. 4 naapertorlugu nalikilliliissutaasunik ilanngaateqartillugit. Pitsanngorsaatitut aningaasartuutit pissarsinermi naliusutut suliarineqartassapput. Ukiup aallartinnerani naliusoq tassaavoq ingerlatsinermut atortut il.il. ukiumi siusinnerusuni pissarsiarinerisa nalingi aammalu aningaasartuutit nalikilliliissutinik ilanngareerlugit nalingat.

Imm. 4. imm. 2, nr. 3-mi aamma 4-mi pigisanik taaneqartunik tunisinikkut naliusut nalikilliliissutigineqarsinnaasup sinnera qimmussimappassuk, nikingassut naatsorsugaq ukiumi aningaasarsiorfusumi tassani isertitatut ilanngunneqassaaq.”

6. § 24, imm. 1, nr. 3 imatut oqaasertaqassaaq: ”akiitsut erniaat taakkunungalu atatillugu sullissinermut matussutissatut ingerlaavartumik ernialiuttakkat, taamaattorli takuuk § 15, imm. 4 aamma 5”.

§ 2

Inatsisartut inatsisaat 15. december 2012-imiit atuutilissaaq ukiorlu aningaasarsiorfusoq 2013 aallarnerfigalugu sunniuteqalissalluni, takuulli imm. 2.

Imm. 2. Inatsisissatut siunnersuummi nr. 3 aamma 4 ukioq aningaasarsiorfusoq 2012 aallarnerfigalugu atuutilerput. Ukiumut aningaasarsiorfusumut 2012-imut, aningaasarsianit akileraarutit pillugit inatsimmi § 22, imm. 2 naapertorlugu nalikilliliissutaasut katinnerannut, selskabip, akileraarutit ilanngaategittinnagit sinneqartoorutaasa akileraaruteqaataasussat 25 procentiinut naapertuuttut qaavatigut ilassutigisinnaavai, aatsaalli aningaasarsianit akileraarutit pillugit inatsimmi § 22, imm. 2 aamma 5 malillugit nalikilliliisoqareerneratigut. Ukiumi aningaasarsiorfusumi 2012-imi § 22, imm. 2, nr. 4-mi nalikilliliissutaasinnasutut killiussaq 75.000 koruuniuvoq. Selskabinut il.il., ukiumik kippingasumik

anigaasarsiorfeqartunut, piffissaq naatsorsuusiorfik 31. august 2012-imut siusinnerusumiluunniit killeqarpat, inatsit sunniuteqartumik aatsaat atuutilissaaq ukioq anigaasarsiorfik 2013 aallarnerfigalugu.

Namminersorlutik Oqartussat, ulloq 3. december 2012

Kuupik Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut